

La Currezia durant la dispita d'investitura

Nova publicaziun istorica

■ (anr/vi) **En il temp medieval – enturn il 1100 – hai dà en l'Europa la «dispita d'investitura». Fabian Renz ha examinà en sia lavur da licenziat la situaziun en Currezia. La lavur ha l'Archiv chantunal dal Grischun uss edì en il cudesch cun il titel «Churrätien zur Zeit des Investiturstreits (1075–1122)». Il cudesch sa drizza ad istorichers u a persunas che sa dattan giu cun il svilup da la politica da Baseligia.**

Tge è la dispita d'investitura in summa?

«Investitura» tuna in pau sco investiziun. En il temp medieval n'aveva quest pled dentant betg da far cun bancas e finanzas. Tut-tina pudevan quels ch'èn vegnids «investgids» quintar cun ritgezza ed abundanza. Il pled deriva numnadain dal pled latin «vestire» e munta «vestgir» – per exempel il vestgir d'in spiritual u d'in uvestg, sch'el vegn installà en ses uffizi.

Pervi da las investituras d'uestg ed avats hai dà enturn il 1100 ina dispita tranter retgs e papas. La dispita ha cumpiglià ina gronda part da l'Europa e

cuzà plirs decennis. L'entschatta dal 11avel tschientaner na vegniva numnadain betg quel uvestg u avat che possedeava las qualificaziuns spiertalas. Anzi, l'investitura d'in uvestg era in giu politic. I gieva per pussanza e possess. Ils uffizis vegnivan schizunt cumprads. Ils retgs e papas avevan grond interess da pudair reparter sezs uffizis, ch'eran cumbinads cun territoris e dretgs. Tgi dastga pia reparter ils uffizis? Il retg u il papa? Quai era la dumonda cardinala e la basa per la dispita che ha era chaschunà guerras.

L'uestgieu da Currezia

Renz ha examinà en sia lavur la situaziun da la Rezia superiura (Oberrätien) durant quest temp. El descriva ils quatter uvestgs da Cuira ch'èn stads en uffizi, ed el emprova da situar lur agir e lur politica. Quai n'è betg simpel, perquai che las fontaunas istoricas davart quel temp e quella regiun èn fitg stgarsas. La Currezia na sa chattava gea betg gist en il focus dals cronists da lez temp.

Singuls chapitels deditgescha Renz a las claustras da Mustér, Faveras (Pfäfers) e Müstair u a fami-

glias da noblezza sco per exempel quellas da Tarasp.

En la resumaziun constatescha Renz che las famiglias da noblezza grischunas n'avevan betg la pussanza da sa mesirar cun l'uestg da Cuira – danor forsa la famiglia da Tarasp. Era las claustras independentas da Mustér e Faveras n'avevan betg gi las re-sursas necessarias per ina guerra.

L'uestgieu da Cuira haja durant la dispita plitost prendì partida per il papa. Ils differents uvestgs hajan dentant gi posiziuns divergentas.

«Ma quant lunsch che la vita dals simpels clerichers e spirituals en las valladas isoladas da la Currezia è la finala vegnida influenzada entras las dispitas grondas da l'istorgia spiertala dal temp, vegn bain a restar per adina en il stgir», finescha l'autur.

Fabian Renz è creschì si a Domat, ha studegià istorgia a l'Universitad a Turitg e rapporta da preschent sco schurnalist per la «Südostschweiz» da la chasa federala a Berna.

Fabian Renz: «Churrätien zur Zeit des Investiturstreits (1075–1122)». Edì da l'Archiv chantunal dal Grischun. 163 paginas. 38 francs. Cuira 2008.